

## Communicaziun a las medias

### Di naziunal da collecta per Nepal

Cuira, 01-05-2015 - **Mardi proxim, ils 05 da matg 2015, rimna la Chadaina da Fortuna ensemen cun la SRG SSR daners per las unfrendas dal terratrembel desastrus en il Nepal. Il terratrembel ha chaschunà ils 25 d'avrigl 2015 enorms donns e plirs millis morts e blessads en il Nepal. Ina da las centralas da la collecta da telefon vegn drizzada en tar RTR Radiotelevisiun Svizra Rumantscha a Cuira. Donaziuns pon vegnir fatgas per telefon via il numer da telefon gratuit 0800 87 07 07.**



La Chadaina da Fortuna rimna ensemen cun la SRG SSR per las unfrendas dal terratrembel a Nepal. (maletg: Keystone)

Ils 05 da matg 2015, vegnan passa 500 voluntarias e voluntaris a prender encunter donaziuns en las unitads d'interpresa da la SRG SSR a Turtig, Cuira, Lugano e Geneva. Ina da las centralas da la collecta da telefon vegn drizzada en tar RTR a Cuira, nua che voluntaris e prominenz (p.ex. Jon Domenic Parolini, Christian Rathgeb, Bischof Vitus Huonder, Ueli Caluori, Mario Cavigelli, Pierin Vincenz, Georg Brosi, Barbara Janom Steiner, Urs Marti, Andy Kollegger etc.) èn tuttadi al telefon.

Durant il di naziunal da collecta pon vegnir annunziadas donaziuns a partir da la damaun a las **06:00 enfin mesanotg** via il numer da telefon gratuit **0800 87 07 07**. Donaziuns pon ins era far da tut temp online via [www.rtr.ch](http://www.rtr.ch) cun empustar in formular da pajament u via [www.glueckskette.ch](http://www.glueckskette.ch).

Era pussaivel èn pajaments directs sin il **conto da schec postal 10-15000-6 (remartga «Nepal»)** – formulars da pajament da la Chadaina da Fortuna pon ins retrair tar mintga uffizi postal. Clients da la Swisscom pon trametter in SMS (gratuit) al numer curt 480 cun l'indicaziun per la donaziun e la summa. Exempel: trametter "Nepal 50" al numer 480. Donaziuns senza ina remartga vegnan repartidas mez a mez per il Nepal e per la Syria.

#### **Dapli infurmaziuns areguard il di naziunal da collecta tar RTR:**

*Claudia Cathomen*

tel. 081 255 75 75 / e-mail [claudia.cathomen@rtr.ch](mailto:claudia.cathomen@rtr.ch)